

13/11/1998

Generasi muda wajar hayati wawasan PM

KOTA KINABALU, Khamis - Pandangan dan pendirian Perdana Menteri, Datuk Seri Dr Mahathir Mohamad yang dikemukakan pada peringkat kebangsaan, serantau dan antarabangsa perlu dihayati semua pihak khususnya generasi muda.

Pengerusi Badan Perhubungan Umno Sabah, Datuk Osu Sukam, berkata demikian ketika melancarkan koleksi ucapan bertajuk Dr Mahathir Mohamad: A Leader dan His Leadership yang disusun Aziz Zariza Ahmad, di sini hari ini.

Osu berkata, buku mengandungi 40 teks ucapan Perdana Menteri yang menyentuh topik penting mengenai politik antarabangsa, ekonomi, perniagaan, agama dan kebudayaan perlu diteliti semua pihak.

"Kandungan ucapan ini penting dibukukan supaya pendapatnya mengenai isu penting yang mempengaruhi corak pemerintahan dan pengurusan negara dapat difahami kita semua khususnya generasi muda," katanya.

Buku setebal 480 muka surat diterbitkan dengan kerjasama Umno Sabah, parti Maju Sabah (SAPP) dan Parti Bersatu Rakyat Sabah (PBRS) turut memuatkan teks ucapan Dr Mahathir sebagai Menteri Kewangan Pertama ketika membentangkan Belanjawan 1999 di Dewan Rakyat baru-baru ini.

Turut hadir pada majlis itu, Menteri Tugas-Tugas Khas, Tun Daim Zainuddin dan Timbalan Ketua Menteri, Datuk Joseph Kurup.

Osu berkata, ucapan yang kemukakan menunjukkan asas pandangan Malaysia dalam isu tertentu yang perlu diberi perhatian semua pihak supaya ia dapat diteliti dari pandangan yang seimbang.

Menurut beliau, ucapan Perdana Menteri jelas menunjukkan pendirian beliau yang tepat, tanpa gentar menyuarakan kepentingan negara kecil supaya tidak diketepikan dalam pengurusan hal ehwal antarabangsa oleh Pertubuhan Bangsa-Bangsa Bersatu, Bank Dunia dan Dana Kewangan Antarabangsa (IMF).

(END)